

25 AUG 2001

PRESIDEN MEGAWATI LAWAT MALAYSIA BERMULA ISNIN

KUALA LUMPUR, 25 Ogos (Bernama) -- Presiden Indonesia Megawati Soekarnoputri akan melakukan lawatan negara dua hari ke Malaysia bermula Isnin.

Lawatan itu, yang pertama kali sejak beliau dilantik sebagai presiden pada 23 Julai, adalah atas jemputan Yang di-Pertuan Agong Sultan Salahuddin Abdul Aziz Shah.

Menurut kenyataan Wisma Putra, Megawati akan diiringi suaminya, Taufiq Kiemas, Menteri Hal Ehwal Luar Noer Hassan Wirajuda dan delegasi 60 anggota.

Semasa lawatan itu, presiden Indonesia itu akan mengadakan pertemuan dengan Perdana Menteri Datuk Seri Dr Mahathir Mohamad.

Kedua-dua pemimpin dijangka akan membincangkan kerjasama dua hala dan bertukar pandangan mengenai isu-isu kepentingan bersama serantau dan antarabangsa, menurut kenyataan itu.

Megawati juga dijadual akan menghadiri jamuan negara yang dianjurkan oleh Sultan Salahuddin dan bertemu dengan masyarakat Indonesia di sini.

Kerajaan Malaysia yakin bahawa lawatan Megawati itu akan memperkukuhkan lagi hubungan erat yang sedia terjalin antara Malaysia dan Indonesia demi kepentingan bersama kedua-dua negara dan rakyatnya, menurut kenyataan itu.

-- BERNAMA

HS HS RHM